

**Innuttaasunut, aalisartut, piniartut savaatillillu inuussutissarsiorlutik
ingerlatsinermanni silap allanngoriartorneranut attuumassutilimmik
ajunaarnersuarmut assingusumik eqqugaasut aningaasatigut ikiorserneqarnissaat
siunertalarugu Naalakkersuisut Aningaasanut Inatsimmi kontumik nutaamik
pilersitseqqullugit Naalakkersuisut peqquneqarnissaannik Inatsisartut
aalajangiiffigisassaattut siunnersuut. Kontomik pilersitsinerup peqatigisaanik kattuffiit
attuumassuteqartut suliamut akuliutsinnerisigut ikorsiisarnermik aaqqissuussinermut
periusissanik aalajangersaanissamik Naalakkersuisut suliaqassapput, tamanna kontumi
pingaarnermi oqaasertaliinikkut imaluunniit namminerisamik inatsisissatut
siunnersueteqarnikkut pissaaq.**

Inatsisartunut ilaasortamit Agathe Fontainimit, Inuit Ataqatigiit, saqqummiunneqartoq

*Inatsisartunut ilaasortamit Pipaluk Lyngemit, Inuit Ataqatigiit, tiguneqarluni
saqqummiunneqartoq*

pillugu

Aningaasaqarnermut Akileraartarnermullu Ataatsimiititaliap

siunnersuutip aappassaaneerneqarneranut

ISUMALIUTISSISSIONAA

Aningaasaqarnermut Akileraartarnermullu Ataatsimiititaliap suliarinninnermini kingullermik
ilaasortarai:

Inatsisartunut ilaasortaq Asii Chemnitz Narup, Inuit Ataqatigiit, siulittaasoq

Inatsisartunut ilaasortaq Bjørk Lange Olsen Jens-Frederik Nielsen, Demokraatit, siulittaasup
tullianut sinniisussaq

Inatsisartunut ilaasortaq Peter Olsen, Inuit Ataqatigiit

Inatsisartunut ilaasortaq Mariia Simonsen, Inuit Ataqatigiit

Inatsisartunut ilaasortaq Kuno Fencker, Siumut

Inatsisartunut ilaasortaq Karl Tobiassen, Siumut

Inatsisartunut ilaasortaq Jens Napaattooq Knud Mathiassen, Attaviitsumut sinniisussaq

UPA 2023-mi ulloq 9. maj 2023 siullermeerinninnerup kingorna ataatsimiititaliap sunnersuut
misissorpa.

1. Siunnersuutip imarisaa siunertaalu

Innuttaasut, aalisartut, piniartut savaatillillu inuussutissarsiorlutik ingerlatsinermanni silap allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqarnissaat siunertaralugu Naalakkersuisut aningaasanut inatsimmi kontomik nutaamik pilersitsinissamik Naalakkersuisut peqquneqarnissaat siunnersuuteqartup siunnersuuteqarnermigut kissaatigaa.

Kiisalu tamatuma peqatigisaanik kattuffiit attuumassuteqartut suliamut akuliutsinnerisigut, konto pingarnermut oqaasertaliussakkut imaluunniit immikkut inatsisissatut siunnersuusiornikkut, ikorsiisarnermik aaqqissuussinermut periusissanik aalajangersaanissamik Naalakkersuisut peqquneqarnissaat siunnersuutigineqarpoq.

Nunarsuarmi silap allanngoriartornera inuussutissarsiornermik inuussutissarsiornermi immikoortunut tamanut kinguneqartoq siunnersuuteqartoq isumaqarpoq. Siunnersuuteqartup isumaa malillugu aalisartut, piniartut savaatillillu pinngortitami inuussutissarsiumminnik ingerlatsisuu-sut sakkortunerpaamik eqqugaapput. Kiisalu siunnersuuteqartoq isumaqarpoq ajornartorsiut siunnersummi pineqartoq aaqqissuussinerni atuuttuni ilaatinneqanngitsoq.

2. Siunnersuutip Inatsisartunit siullermeerneqarnera

Siunnersuut siullermeerinninnermi partiinit amerlanerussuteqartunit taperserneqarpoq, tamatumani piumasarineqarluni suliap imarisauut tunngasut itisilerneqassasut. Tassunga atatillugu oqaluuserineqarpoq tapiissutit qanoq aningaasalersorneqassanersut aammalu tapiissutit qanoq killiliivigineqassanersut, tassungalu ilanngullugu pisut qanoq ittut siunnersummut matumunga ilaatinneqassanersut.

Siullermeerinninnermi Naalakkersuisut allannguutissatut siunnersummit imaattumik saqqummiussipput:

"Innuttaasunut, taakkununngalu aalisartut, piniartut nunalerinermillu inuussutissarsiutillit ilanngullugit, silap pissusiata allanngoriartorneranut attuumassutilimmik ajunaarnersuarmut assingusumik eqqugaasut aningaasatigut ikiorserneqartarnissaat siunertaralugu inuussutissarsiutigalugu aalisartut, piniartut nunalerinermillu suliaqartut aallarteqqinnissamut tapiiffigineqartarneri pillugit inatsimmit atuuttumik allannguinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut. Tamatuma peqatigisaanik Naalakkersuisut suliniaqatigiiffiit eqqugaasut akuutillugit ajornartoornermi ikorsiisutinut aaqqissuussinermi suleriaasissanik aalajangersarneqartunik siunnersuuteqarnissamut peqquneqassapput."

3. Apeqqutit

Ataatsimiititaliap siunnersummit suliarinninnerminut atugassaminik apeqqutit arlallit akis-
siteqarfigeqqullugit Nunalerinermut, Imminut Pilersornermut, Nukissiutinut Avatangiisinullu
Naalakkersuisoq qinnuigaa. Ataatsimiititaliap apeqquataasa aammalu Nunalerinermut, Imminut

Pilersornermut, Nukissiutinut Avatangiisinullu Naalakkersuisup akissutaasa assilineri isumaliutissiissummut matumunnga ilanngussatut 1-tut ilanngunneqarput.

4. Siunersiuineq

Ataatsimiititaliap siunnersuummik suliarinninnerminut atugassaminik apeqqutit arlallit siunersiuinermi akissuteqarfingeqqullugit Nunalerinermut, Imminut Pilersornermut, Nukissiutinut Avatangiisinullu Naalakkersuisoq qinnuigaa. Ataatsimiititaliap apeqqutaasa aammalu Nunalerinermut, Imminut Pilersornermut, Nukissiutinut Avatangiisinullu Naalakkersuisup akissutaasa assilineri isumaliutissiissummut matumunnga ilanngussatut 2-tut ilanngunneqarput.

5. Ataatsimiititaliap siunnersuummik suliarinninner

Naalakkersuisut allannguutissatut siunnersuataat nalinginnaasumik taperserneqartoq ataatsimiititaliamit maluginiarneqarpoq. Aningaasanut inatsimmi kontomik pingaarnermik nutaamik pilersitsinissamik nassataqannginnini Naalakkersuisut allannguutissatut siunnersuataata siunnersuuteqartup siunnersuutaanit allaanerussutigaa. Suliassaqarfik 10-89-imut, Naalakkersuisut tunngasumut, oqaasertaliussaq nr. 7 Naalakkersuisut innersuussutigaat. Innuttaasunut toqqaannartumik eqqugaasunut immikkut ittumik ikorfartuisoqarallarnissaanut aningaasartuuteqarnerunermut 10 mio. kr.-it angullugit akiliinissamik Naalakkersuisut oqaasertaliussakkut piginnaatinneqarput. Siunertamut kontomik nutaamik pilersitsinissaq pisariaqarunnaarsillugu inuussutissarsiutigalugu aalisartut, inuussutissarsiutigalugu piniartut inuussutissarsiutigalugulu nunalerinermik ingerlataqartut aallarteqqinnissamut tapiiffigineqartarerat pillugu inatsit atuuttoq naleqqussarneqassaaq.

Silap allangorneranik aalisarneq piniarnerluunniit unammillernartillugit imaluunniit pisinnaatinagut aalisartut piniartullu aningaasanik ikiorserneqarnissamut qinnuteqarnissaannut periarfissat annertusiniarlugit inatsit nutarterneqaleruttortoq Naalakkersuisut paasissutissiisutigaat. Tassunga atatillugu qimminut qimuttunut nerukkaatissanik pisinermut tapiissuteqarsinnaanerup periarfissaanissaanik siunnersuut assersuutigalugu sulissutigineqartoq paasisutissiissutigineqarpoq. Allannguutissatut siunnersuut UPA2024-mi Inatsisartunut saqqumiunneqassasoq Naalakkersuisunit naatsorsuutigineqarpoq.

Tamatuma saniatigut Naalakkersuisut paasissutissiissutigaat aalisartut piniartullu inuussutissarsiornermi sillimmasiinissamik piumasaqaateqarnermut ilaatinneqartut. Nunalerisut piumasaqaammi tamatumani ullumikkut ilanngimmata nunalerisut aaqqissuussinermut tassunga amma ilaatinneqalernissaat Naalakkersuisut kissaatigaat.

Tassunga nangissutitut Naalakkersuisut paasissutissiissutigaat pisuni sillimmasiissutinit matussuserneqarsinnaanngitsuni toqqaannartumik eqqugaasunut immikkut ittumik ikorfartuisoqarallarnissaanut aningaasartuuteqarnerunermut Naalakkersuisut, 2023-mi aningaasanut inatsimmi suliassaqarfimmut 10-89-imut oqaasertaliussaq nr. 7 naapertorlugu, akiliisinnaasut.

Tassunga ilaapput nalinginnaasumik ilaapput ajunaarnersuit ajutoornerillu, tassunga ilangullugit pinngortitami ajunaarnersuit pisullu allat ajunaarnersuartut ittut siulittuutigineqarsinnaasimannngitsut. Kiisalu Naalakkersuisut paassisutissiissutigaat periarfissamut aammailaasut ajunaarnersuit silap allanngorneranik pissuteqartut.

Oqariartaatsip siunnersuummi atorneqartup 'ajunaarnersuartut assingusumik' paasinarsisin-nissaa ataatsimiitaliamut qitiusimavoq, tassa taassuma siammassisumik paasineqarnissaanik ammaassisooqarmat. Naalakkersuisut ataatsimiitaliap apeqqutaanut akissutiminni oqariartaa-seq ima nassuiarpaat:

Tassalu Naalakkersuisut "ajunaarnersuarmut assingusumik" pillugu nassuaataat tas-saavoq pisoq, tassanngaannartumik naatsorsuutigeriinngisamillu peqquteqann-gitsoq, kisiannili inunnut, pigisanut avatangiisinullu ajoqsiinerit, najukkani inu-iaqatigiinnit oqartussaasunillu ulluinnarni isumalluutit pissarsiarineqarsinnaasut atorlugit isumagi-sinnaanngitsoq"

"Ajunaarnersuarmut assingusumik" pisup tassanngaannartumik naatsorsuutigeriinngisamillu peqquteqanngitsutut Naalakkersuisunit nassuiarneqarnera innuttaasunut, taakkununngalu ilanngullugu aalisartunut, piniartunut savaatilinnullu inuussutissarsiuutiminnik ingerlatsinerminni ajunaarnersuarmut assingusumik tassanngaannartumik nalaanneqartunut, aningaasatigut ikorsiisinnaaneq pillugu Naalakkersuisut namminneq allannguutissatut siunnersuutaannut naapertutinngitsutut ataatsimiitaliamit isumaqarfiginarpoq.

Pisut tassanngaannartut siunnersuummi pineqarmata pisut, siunnersuuteqartoq Naalakkersuisullu naapertorlugit aningaasatigut ikorsiissutigineqarsinnaasut, Naalakkersuisunit erseqqinnerusumik assersuusiorfigineqarnissaat pisariaqartinneqartoq ataatsimiitaliaq isumaqarpoq. Siuliani taaneqartutut Aningaasaqarnermut Akileraartarnermullu Naalakkersuisoq ataatsimiitaliamit siunersiorneqarpoq. Aningaasanut inatsisisatut siunnersuutip pingajussaneerne-qarnissaanut allannguutissatut siunnersuutinik Naalakkersuisut saqqummiussissasut paassisutissiissutigineqarpoq. Tassunga atatillugu pisuni assigiinngitsuni sorlerni aammalu Naalakkersuisut suliassaqarfii akimorlugit oqaasertaliussanut allannguutit aningaasanut inatsimmiilanngunneqarsinnaanersut erseqqinnerusumik nassuaatigineqassaaq. Tamatumani siunertari-neqartoq tassaavoq pisut, suliaq matumani pineqartoq naapertorlugu aningaasatigut ikorsiiffi-gineqarsinnaasut, sapinngisamik amerlanerpaat matussusiiffigineqarsinnaanissaat.

Naalakkersuisut allannguutissatut siunnersuutaata kalaallisoortaani danskisuuanilu oqaatsit atorneqartut assigiinngitsuusut Naalakkersuisup siunersiuinermi paassisutissiissutigaa. Assigiinngissut tassaavoq oqaaseq "tassanngaannartumik" danskisuuanilaammat, kalaallisuuani kukkusqarneratigut ilaanani. Atortussani Inatsisartunut saqqummiunneqartuni oqaatsit atorneqartut akornanni naapertuttoqarnissaata qulakkeerneqarnissaa pingaaruteqarmat ataatsimiitaliamit erseqqissaatigineqassaaq. Tamanna tunngavigalugu allannguutissatut siunnersuutip

kalaallisuuata iluarsineqarneranik imaqaqtumik allannguutissatut siunnersuummik akissute-
qaammi saqqummiusseqqullugit Naalakkersuisut ataatsimiititaliamit **kaammattorneqarput**.

Nunalerinermik inuussutissarsiuteqartut aalisartut piniartullu assigalugit inuussutissarsiummut sillimmasersimanissamik piumasaqaammut ilanngunneqassasut Naalakkersuisunit kissaatigi-neqarpoq. Aningaasatigut annaasaqannginnissamut qularnaveeqqusiineq, sillimmasiissutinik eqqortunik qulakkeerininnissaq kiisalu sillimmasiissutit pillugit naleqquttumik siunnersor-neqarsinnaaneq eqqarsaatigalugu aalisartut piniartullu sillimmasiisarnermik aaqqissuussinerit atukkatik pillugit misilittagaat Naalakkersuisunit qanoq ilisimasaqarfingineqarpat?

Siuliani allassimasut tunngavigalugit ataatsimiititaliaq isumaqarpoq siunnersuuteqartup siunnersuuteqarnermigut anguniagai konto pingarnermik nutaamik pilersitsinngikkaluarluni piviu-sunngortinneqarsinnaasut. Tamatuma peqatigisaanik ataatsimiititaliamit maluginiarneqarpoq aalajangiiffigisassatut siunnersuutip taassisutissartaa Naalakkersuisut allannguutissatut siunnersuutit saqqummiussaanni aalajangiusimaneqartoq.

6. Siunnersuutip aningaasaqarnikkut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinnerani aningaasaqarnikkut allaffissornikkullu kingunerisassat siunnersuutip tunngavilersuutaani aallaaserineqassasut. Tamanna naapertorlugu siunnersuutip piviusunngortinnerani aningaasatigut kingunerisassat siunnersuummi nalunaarneqartut, taamaalillunilu tamanna A/C fuldmægtigip ukiumi iluitsumi 500.000 kr.-inik naleqartumik sulineranik kiisalu konto pingarnerup siunnersuutigineqartup ingerlaavartumik aqtsivigineqarnissaanut A/C fuldmægtigip ukiup affaanik 250.000 kr.-inik naleqartumik sulineranik naleqartussatut naatsorsuutigineqartoq, ataatsimiititaliamit maluginiarneqarpoq.

7. Ataatsimiititaliap inassuteqaatai

Allannguutissatut siunnersummik ataatsimiititaliami amerlanerussuteqartunit kissaatigineqartumik Naalakkersuisut saqqummiussereerneranni Naalakkersuisut allannguutissatut siunnersuutaat ilusimisut iluseqartoq akuerineqassasoq **ataatsimiititaliami amerlanerussuteqartut** Inuit Ataqatigiinneersut aamma Siumumeersut inassutigaat.

Siunnersuut Naleraq-meersullu allannguutissatut siunnersuutaat itigartinneqassasut **ataatsimiititaliami amerlanerussuteqartut** Inuit Ataqatigiinneersut aamma Siumumeersut inassutigaat.

Siunnersuut Naalakkersuisullu allaanguutissatut siunnersuutaat itigartinneqassasut **ataatsimiititaliami ikinnerussuteqartup** Naleraq-meersup inassutigaat.

Ataatsimiititaliami ikinnerussuteqartup Naleraq-meersup allannguutissatut siunnersummik imaattumik saqqummiussivoq:

"Innuttaasunut, aalisartut, piniartut savaatillillu inuussutissarsiorlutik ingerlatsinerminni silap allanngoriartorneranut siuarsaanissamut nammineq aningaasarsiornissaannut iluaqutaasumik siuarsaanissamik aningaasaateqarfimmik Naalakkersuisut Aningaasanut Inatsimmi kontumik nutaamik pilersitseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut."

Siunnersuut, Naalakkersuisullu siunnersuutaat aammalu Ataatsimiititaliami ikinnerussuteqartup Naleraq-meersup allannguutissatut siunnersuutaat itigartinneqassasut **ataatsimiititaliami ikinnerussuteqartup** Demokraatineersup inassutigaat.

Ataatsimiititaliami ikinnerussuteqartoq siuliani taaneqartoq inassuteqaamminut atatillugu ima ikinnerussuteqarluni oqaaseqarumavooq:

"Nunarsuatsinni silaannaap allanngoriartornera maani Kalaallit Nunaanni malugineqarsinnaavoq. Tamanna qularutissaanngilluinnarpoq. Qularutissaanngilluinnarportaaq, aalisartunut, piniartunut savaatilinnullu inuussutissarsiutimik ingerlanneranni kinguneqarnerlus-sinnaammat, inuussutissarsiortunullu taakkununnga piumasaqataalluni sungiussiniar-nissaaq naleqqussarnissarlu.

Siunnersuuteqartup siunnersuuteqarnermini kissaatigaa, Aningaasanut inatsimmi konto pingaarnermik pilersitsisoqassasoq soorlu assersuutigalugu aalisartut, piniartut savaatillillu, inuussutissarsiutimik ingerlanneranni ajunaarnersuartut ittumik eqqorneqassagaluarpatu ikioriissutissanut, nunarsuatsinni silaannaap allanngoriartorneranut attuumassuteqarpat.

Siunnersummi ajornartorsiut pingaarnerpaaq unaavoq, nassuiaruminaassamat, qaquguk-kut ajunaarnersuartut ittumik nunarsuatsinni silaannaap allanngoriartorneranut attuumassuteqartumik taaneqarsinnaanissaat. Eqqaamassavarput, silarlunnerit anorersuarujus-

suillu aamma piooreersimammata, silaannaap allanngoriartorneranik taaneqartalerneratali siorna.

Tamannalu tunngavigalugu apeqquuit arlallit akineqaqqaartariaqarput Aningaasanut inatsimmi konto pingaarnermik ajunaarnersuaqarneranut ikorsiissutissanik pilersitsinis-saqilumut pisariaqarnersoq paaseeqqaassallugu. Apeqquut akissuteqarfigineqanngitsoq soorlu assersuutigalugu:

Aningaasat qassit kontomut taamaattumut illikartinneqassappat? Qanoq aningaasalersor-neqassappat? Qaqugukkut ajunaarnersuarmik taaneqarsinnaassava? Qaqugukkut ajunaarnersuarmik taaneqarsinnaassava, nunarsuarmi silaannaap allanngoriartorneranut attuumassuteqartutut? Kia ajunaarnersuartut pisoqassappat nunarsuarmi silaannaap allanngoriartorneranut attuumassuteqarnersoq aalajangissavaa?

Siunnersuuteqartup imaluunniit Naalakkersuisut apeqquuit taakku akisinnaasimanngilaat, taassumalu kinguneraa, siunnersuut aalisartunut, piniartunut savaatilinnullu piviusuun-ngitsumik toqqisisimatissammat. Eqqortomi unaammat, taakku eqimattat tamarmik ajunaarnersuaqassagaluarpat ikiorserneqarnissaq qulakkeersinnaanngimmassuk.”

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Asii Chemnitz Narup
Siulittaasoq

Bjørk Lange Olsen

Peter Olsen

Mariia Simonsen

Kuno Fencker

Karl Tobiassen

Jens Napaattooq